

[www.BibleForChildren.org](http://www.BibleForChildren.org)



## Yohana 14



Yesu akawalongela, "Mkotoho kunyengemala.  
Mngumkwinila Sapanga, munikwinili na nenga hilahila."  
Ukaya kwa Tati wa nenga kuwela na fyumba fitangala.  
Handa ingawelili ng'ogha nagha, ningaliwalongela kala,  
hinaa ninguyenda kuwayandalila mahala.



Na paniteyenda na kuyandala mahala kwaikiva gha mwenga, nitehuya na kuwatola, ili na mwenga muwesi kuwela pala niwela nenga.



Nenga Yohana, mlongo wa mwenga kukumkwini  
Kilisito, tungufumilala mahakilo pamonga  
kwaikiva gha Yesu na unkosi ghaki.


Niwelili kukihiwa kya Patimo  
kwaikiva haku avikilwi




mkihungu kwa  
kuwoneka na kosa  
Iya kutangasa  
Habali Maha gha  
Yesu Kilisito.




Lipindi lilalila Mpumulo wa Sapanga akanighola kulola na kuhyoghanila vindu vitangala, nikalola kitamilo kya kinkosi haku kundumba kitamilwi na mmonga.



Hinu nikayughanila kila kiumbi kundumba na mumlimawogha, na pai kumambi na mbahali na fyogha viwelili mghati ghaki vikilonga, "Kuyinulwa na utundamilu na ukulu na uwesa ni fyaki mweni atamili kukila kitamilo kya kinkosi na kwa mwanakondolu, machuwa hyogha bila mwihu."



Nikalola mmbwani wa Sapanga, Yelusalemu hyonu yenikuwela mmbwani wa Sapanga, ukihuluka kuhuma kundumba kwa Sapanga. Uwelile uyandalwa maheli handa mdala wa uposo mweni kuvikwa malembu kwaikiva gha mngwana ghaki.



Hinu nikahyoghanila lilowi likulunga kuhuma kukikalilo kya kiinkosi likilonga, "Hinaa Sapanga atelikala paghati kwa weni, Sapanga atelikala pamonga na weni, watewela wandu ghaki, Sapanga mweni atewela na weni na mweni atewela Sapanga ghao."



Hinu yula mtumikila wa Sapanga wa kundumba akanilangiha lweni lwa masi gha ukomu, masi ghaki yeni kung'anyima handa kiou yakihuma kweni kitamilo kya kinkosi kya Sapanga na Mwanakondolu.



Mbwani hau ungupala ng'ogha mhana wa lijuwa wala mbalamwehi, kwaikiva ukulu wa Sapanga wenikuhuma kwa Sapanga unguulangasila mmbwani hau na limbamba lyaki ni yula Mwanakondolu.




Ila kwahela kindu chochosi kyeni kujumilwa ng'ogha na Sapanga kiteyingila hamu, wala mundu yeyosi mweni kughola mighalu gha kuhyomelesa au gha ululunganyi ateyingila ng'ogha hamu. Wateyingila hamu ni wala weka wenikuyandikwa kukihitabu kya ukomu kya Mwanakondolu.




Mweni ateyapyata masosi ghao hyogha, kwaikiva kuhwegha kutewoneka ng'ogha kangi, wala malumbililo, wala kililo, wala mahakilo, kwaikiva mighalu gha mtumbulo ipita kala.




Kutewela ng'ogha na kulapilwa kokosi kangi. Kitamilu kya kiinkosi kya Sapanga na kya Mwanakondolu kitewela kummbwani hau, na watumikila ghaki watemtumikila, wateulola wusu ghaki, na lihina lyaki liteyandikwa kunani gha vibhungi vya wusu ghao.



Nikawalola wandu wakulunga na wanung'una wahovili wagholoka kuulongolo gha kila kitamilo kya kinkosi. Vihitabu vikagubutulwa, hinu kihitabu kighangi kikagubutulwa na kyeni ni kihitabu kya ukomu. Wandu wahovili wakatoswa kukovekelana na matendu ghao yeni kuyandikwa kweni vihitabu havi. Mundu yoyosi mweni kuwela lihina lyaki liyandikwa ng'ogha kukihitabu kya ukomu na mweni hilahila ataghilwi kulihiwa Iya Iyoto na baluti.



Mpumulo wa Sapanga na mdala wa uposu wa Mwanakondolu wangumkema Bambu wangulonga, "Uhiki!" na kila mundu mweni kuhyoghanila hali na alongi, "Uhiki!" Mweni kuwela na kuyumilila ahiki na kila mweni kupala, na atole masi gha ukomu bila mahipo.



Kwaikiva Sapanga apalili nesu mlima  
wogha hata akamuhumisa Mwana  
ghaki wa weka, lukani kila mundu  
mweni kumkwinila hayu Mwana  
akotoho kuyaghamila, ila apokeli  
ukomu wa machuwa hyogha  
bila mwihu.



Waloma 3:23 wandu wogha waghohile sambu na kulepelelwa kughola kila akipalile Sapanga waghohi.

Waloma 6:23 Kwaikiva mahipo gha sambu ni kihu, ila fwaida gha Sapanga ni ukomu wa machuwa hyogha bila mwihu ku Kilisito Yesu Bambu wa twenga.

Wahebulania 9:27 Handa mundu vila kavikilwa kuhova lihanja limonga hela na badili gha kuhova kulamulwa.

Waefesu 2:8,9 Hinu kwaikiva mlokolwa kwa umaha wa Sapanga, kwa njila gha kukwinila, ng'ogha kwa matendu maheli mghola. Ulokola hau ni hupo kuhuma kwa Sapanga. Kawalokola ng'ogha kukovekelana na matendu maheli mghola, hinu mundu yoyosi akotoho kulitutumula.



Waloma 10:9,10 Ikiva utelonga kiuhighgiliso kwa mlomo ghako wenga mweni yiwa Yesu ni Bambu na kukwinila mmoyu ghako yiwa Sapanga ndiwa amhindulili kuhuma kukihu, utelokoka. Kwaikiva mundu angukwinila kwa moyu akajumilwa kuulongolo gha Sapanga, na angulongela kiuhighiliso kwa waghangi mweni handa mweni kwa mlomo ghaki atelokolwa.

Yohana 3:16,17 Kwaikiva Sapanga apalili nesu mlima wogha hata akamuhumisa Mwana ghaki wa weka, lukani kila mundu mweni kumkwinila hayu Mwana akotoho kuyaghamila, ila apokeli ukomu wa machuwa hyogha bila mwihu. Kwaikiva Sapanga kamyegha ng'ogha Mwana ghaki kutosa mlima wogha, ila kuulokola.



1 Yohana 5:11-13 Habali gha chakaka yeni ndiwa hai, Sapanga katupatila ukomu wa machuwa hyogha bila mwihu, ukomu hau tunguupokela kwa kumkwinila Mwana ghaki. Mundu mweni umonga na Mwana wa Sapanga, hayu kana hau ukomu. Ila yula kawela ng'ogha na umonga na hayu Mwana wa Sapanga, hayu kahela hau ukomu. Ninguwayandikila mighalu hai mwenga weni kumkwinila Mwana wa Sapanga, ili mmanyi yiwa muwela na hau ukomu wa machuwa hyogha bila mwihu.



Yohana 14; 2 Wakolintu 5; Ugubutulo 4, 21, 22

Storyline by: Edward D. Hughes

Illustrated by: Lazarus  
and Alastair Paterson

Adapted by: Sarah S.

Mbunga NT (mgy) @The Word for The World International  
and Mbunga Language translation, 2025.

All rights reserved.

©2026 Bible for Children, Inc.

[www.M1914.org](http://www.M1914.org)

[www.bibleforchildren.org](http://www.bibleforchildren.org)

